

दिनांक 15.08.2025

समय: 18.45 बजे

आकाशवाणी जयपुर—अजमेर
प्रादेशिक समाचार

- प्रधानमंत्री नरेन्द्र मोदी उन्हासीवां स्वतंत्रता दिवस जळसा मांय लाल किला री प्राचीर ऊं आत्मनिर्भर भारत सारू केई कार्यक्रमों रो ऐलाण कर्यो — ऑपरेशन सिन्दूर री सराहना करता वणा कह्यो के भारत परमाणु धमकियां ने बर्दाश्त नी करेला।
- मुख्यमंत्री भजन लाल शर्मा राज्य थर रा जळसा मांय बोलता वोकल फोर लोकन ने बधावो देवण री अरज करी।
- देश रो जुलाई महीना तांई निर्यात बध ने 37 अरब 24 करोड़ डॉलर रो व्हीयो—लारली साल रे मुकाबले सात दशमलव तीन फीसदी री बढवार।
- प्रदेश मांय न्यारी—न्यारी ठोडां बिरखा रा दौर मांय मामूली कमी—काले उं कोटा, उदयपुर, अजमेर अर जयपुर संभागां मांय कठे कठे बिरखा री गतिविधियां बधण री आस।

देश आज उन्हासी वो स्वतंत्रता दिवस मना रियो है। प्रधानमंत्री नरेन्द्र मोदी दिल्ली मांय ऐतिहासिक लालकिला माथे राष्ट्रीय ध्वज फहरा र स्वतंत्रता दिवस जळसा री अगुवाई करी। लालकिला री प्राचीर ऊं राष्ट्र ने संबोधित करता प्रधानमंत्री ऑपरेशन सिंदूर रा जाबाज सैनिकां ने नमन कर्यो। वणां कह्यो के ऑपरेशन सिंदूर देश रा सशस्त्र बलां रा साहस अर शौर्य रो मजबूत साक्ष्य है। प्रधानमंत्री कह्यो के सरकार सशस्त्र बलां ने रणनीति तियार करण, लगस अर बगत तय करण री खुली छूट दी। देश रा बहादुर सैनिकां, दुश्मनां ने मुंहतोड जवाब दियो अर पाकिस्तान मांय सैकड़ों किलोमीटर मांय जा र आतंकवादियां रा ठिकाणा ने ध्वस्त कर्यो। वणां कह्यो के पहलगाम आतंकी हमला ने ले र देश रा हर रहवासी मांय रोष हो अर ऑपरेशन सिंदूर वां रा रोष री ई अभिव्यक्ति ही। श्री मोदी कह्यो के भारत अबे फैसेलो कर लियो है के लहू अर पाणी एक साथ नी बेवेला। वणां कह्यो के भारत परमाणु हमला री धमकी अबे बर्दाश्त नी करेला।

प्रधानमंत्री कह्यो के भारत दुश्मनां ने करारों जवाब देवण सारू मजबूत हथियार प्रणाली— सुदर्शन चक्र मिशन सुरू करेला।

प्रधानमंत्री आत्मनिर्भर भारत ने विकसित भारत रो आधार थांबो बताया। वणां रक्षा, प्रौद्योगिकी, ऊर्जा, अंतरिक्ष अर विनिर्माण हलका मांय देश री प्रगति रो जिक्रो कर्यो।

श्री मोदी जोर देवता कह्यो के मेड इन इंडिया हथियारां समेत स्वदेशी बूतां ऊं भारत निर्णायक अर स्वतंत्र कार्रवाई करण मांय सक्षम व्हीयो है। श्री मोदी एक लाख करोड़ रूप्या रा प्रधानमंत्री विकसित भारत रोजगार योजना सरू करण रो ऐलान कर्यो।

प्रधानमंत्री ऐलान कर्यो के आवती दिवाळी ताई नेक्स्ट जेनरेशन जीएसटी सुधार सरू कर्या जायेला। इण रो मकसद रोज काम री चीजां माथे टैक्स री रेट कम करणो है। वणां कह्यो के सुधारां ऊं लोगां, काश्तकारां, मझला तबका ने मदद मिलेला अर आर्थिक गतिविधियां मांय तेजी आवेला।

श्री मोदी कह्यो के भारत रा बजट रो मोटो हिस्सों आज ई पेट्रोल, डीजल अर गैस आयात माथे खर्च व्हे रियो है। वणां समुद्री संसाधनां रा दोहन सारू गहरा पाणी मांय खोज करण राष्ट्रीय मिशन बणावण रो ऐलान कर्यो। वणां कह्यो के सोलर, हाईड्रोजन अर परमाणु ऊर्जा रा हलका मांय पसारो कर्यो जायेला। श्री मोदी ने जोर दे र कह्यो के भारत री स्वतंत्रता री 100 वीं वर्षगांठ ताई देश रो लगस परमाणु ऊर्जा बूता मांय दस गुना बढ़वार करणो, ऊर्जा हलका मांय आत्मनिर्भरता बधाणो अर स्थायी विकास मांय मदद करणो है।

आपरा सम्बोधन मांय प्रधानमंत्री नरेन्द्र मोदी लारला सौ सालां उं देश सेवा रे प्रति राष्ट्रीय स्वयंसेवक संघ रा स्वयंसेवकां री प्रतिबद्धता री सराहना करी अर कह्यो के हजारों स्वयंसेवकां व्यक्ति निर्माण उं राष्ट्र निर्माण रा संकल्प रे साथे देश सारू आपरो जीवन समर्पित कर्यो।

इण उं पैला प्रधानमंत्री राजघाट गया अर राष्ट्रपिता महात्मा गांधी ने श्रद्धांजलि अर्पण करी।

प्रदेश मांय ई स्वाधीनता दिवस जळसापूरण मनायी ज्यो। जोधपुर रा बरकतुल्लाह खां स्टेडियम मांय व्हीया राज्य थर रा जळसा मांय बोलता मुख्यमंत्री भजनलाल शर्मा कह्यो के समाज रा सगळा तबका रे आत्मनिर्भर बणण ऊं ई देश आत्मनिर्भर बणेला। वणां कह्यो के राज्य सरकार विकसित भारत 2047 रा संकल्प ने पूरो करण सारू केन्द्र सरकार रे साथे कदम उं कदम मिला र चाल री है। वणां राज्य सरकार री न्यारी-न्यारी जनकल्याणकारी योजनावां रो जिक्रो करता कह्यो के समाज रा हर पात्र मिनख ने इण रो फायदो पुगायो जावे। मुख्यमंत्री वोकल फॉर लोकल ने बधावो देवण री ई अरज करी।

मुख्यमंत्री ध्वजारोहण करने मार्च पास्ट रो निरीक्षण कर्यो। इण उं पैलां वणां जोधपुर रा सर्किट हाउस मांय झंडो फहरायो अर शहीद स्मारक माथे पुष्प चक्र अर्पण करने श्रद्धांजलि दी।

राज्यपाल हरिभाऊ बागडे जयपुर मांय राजभवन मांय झंडो फहरायो। ई दौरान राज्यपाल राजभवन परिसर रा सरकारी स्कूल रा ठावा नम्बर लावण वाळा पढेसरां ने ईनाम मांय किताबां अर मिठाईयां बांटी। राज्यपाल 'एक पेड़ मां के नाम' अभियान रे तैत खेजड़ी रो पौधो ई लगायो। विधानसभा अध्यक्ष वासुदेव देवनानी विधानसभा मांय ध्वजारोहण कर्यो। वटे ई जयपुर मांय चौगान स्टेडियम मांय व्हीया जिला थर रा जळसा

मांय उपमुख्यमंत्री प्रेमचन्द बैरवा झंडो फहरायो अर परेड री सलामी ली। प्रदेश भाजपा मुख्यालय माथे भाजपा प्रदेश अध्यक्ष मदन राठौड झंडो फहरायो। वठे ई प्रदेश कांग्रेस कमेटी दफ्तर माथे प्रदेश अध्यक्ष गोविन्द सिंह डोटासरा राष्ट्रीय ध्वज फहरायो। ई मौके पैली रा मुख्यमंत्री अशोक गहलोत, नेता विपक्ष टीकाराम जूली समेत दूजा लोग मौजूद रिया।

प्रदेश रा न्यारा-न्यारा जिला मांय ई प्रभारी मंत्रियां, संभागीय आयुक्तां अर जिला कलेक्टर राष्ट्रीय ध्वज फहरायो। डीग जिला मुख्यालय माथे गृह राज्य मंत्री जवाहर सिंह बेढम झंडो फहरार परेड री सलामी ली। कोटपूतली-बहरोड़ जिला मांय उपमुख्यमंत्री दीया कुमारी राष्ट्रीय ध्वज फहरायो। ई मौके वणां वीरांगनावां अर ठावा काम करण वाळी प्रतिभावां रो सम्मान कर्यो। पाली मांय जिला थर रा जळसा मांय गौपालन मंत्री जोराराम कुमावत झंडो फहरायो। कोटा मांय व्हीया स्वाधीनता दिवस जळसा मांय शिक्षा मंत्री मदन दिलावर ध्वज फहरा र परेड री सलामी ली।

बाडमेर रा आदर्श स्टेडियम मांय व्हीया जळसा मांय उद्योग राज्यमंत्री के.के. विश्णोई तिरंगो फहरायो। जल संसाधन मंत्री सुरेश सिंह रावत अजमेर रा पुलिस लाइन मैदान मांय व्हीया जळसा मांय ध्वज फहरायो।

राज्यभर मांय न्यारा-न्यारा दफ्तरां, कारोबारी ठिकाणां अर घरां माथे लोगां तिरंगो फहरायो। इण रे साथे ही स्कूलां अर शैक्षणिक संस्थावां मांय सांस्कृतिक कार्यक्रम व्हीया। ई बीचे जयपुर मांय राजभवन मांय आज सिंज्या एट होम कार्यक्रम व्हीयो। कार्यक्रम मांय राज्यपाल, मुख्यमंत्री समेत कैबिनेट रा दूजा मंत्री भेळा व्हा। इण रे अलावा जन नुमाइदां, आला अहलकार अर समाज रा न्यारा-न्यारा तबका रा खास लोग मौजूद रिया।

जुलाई महीना मांय भारत रो निर्यात बधने 37 अरब 24 करोड़ डॉलर रो व्हेग्यो है। लारली साल रे मुकाबले इण मांय 7 दशमलव तीन फीसदी री बढवार व्ही है। वाणिज्य अर उद्योग मंत्रालय रा अस्थाई आंकड़ा मुजब चालता रोकड बरस मांय अप्रैल महीना ऊं जुलाई रे बीचे भारत रो निर्यात बधने 149 अरब बीस करोड़ डॉलर रो रियो, जदके देश रो आयात ई बधने दो सौ 44 अरब डॉलर ऊं ऊपर रियो। निर्यात करी जावण वाळी चीजां मांय इंजीनियरिंग सामान, रत्न अर जेवर, इलेक्ट्रानिक्स, दवाईयां अर रसायन खास हैं।

प्रदेश रा अगूणी हलका मांय लारला 24 घंटां मांय कुछ ठोडां हळकी ऊं मझली बिरखा व्ही। इण रे अलावा कठे कठे भारी बिरखा ई व्ही। वठे ई आथूणी राजस्थान मांय कुछ ठोडां हळका ऊं मझला दर्जा री बिरखा व्ही। मौसम केन्द्र जयपुर मुजब सब ऊं बत्ती 9 सेंटीमीटर पाणी टोंक रा निवाई मांय बरस्यो। मौसम महकमो राज्य रा अगूणी हलका मांय आज अर आथूणी हलका मांय काले ऊं बिरखा री गतिविधियां मांय बढवार री आस जतायी है। काले कोटा, उदयपुर, भरतपुर, अजमेर अर जयपुर संभागां मांय केई ठोडां बिरखा व्हेवण री आस है। वठे ई जोधपुर अर बीकानेर संभाग मांय कुछ ठोडां हळकी ऊं मझली बिरखा व्हे सके है।

भगवान श्री कृष्ण रा जन्म उत्सव न लेर प्रदेशभर रा मिंदरां मांय तैयारियां चाले। जन्माष्टमी तिंवार न ले र जयपुर मांय यातायात रा खास इंतजाम करी ज्या है। श्री गोविन्द देव जी मिंदर मांय खास सजावट करी ज्यी है, वठे ई पाली रा गीता भवन, गोपीनाथ, चारभुजा मिंदर समेत न्यारा-न्यारा कृष्ण मिंदरां ने मोवणा फूलां, गुब्बारां अर लाईटां उं सजाया जावे।

सवाईमाधोपुर जिला मांय जन्माष्टमी तिंवार न लेर लोगां मांय खास उमाव निजर आवे। करौली मांय जन्माष्टमी न लेर तैयारियां जोरां माथे है। और ब्योरां म्हारा खबरनवीसां उं—
